

Immap naqqani aatsitassarsiortoqannginnissaa siunertaralugu Naalakkersuisut inatsisilioqqullugit Inatsisartut alajangiiffigisassaattut siunnersuut.

(Inatsisartunut ilaasorta, Pipaluk Lynge, Inuit Ataqtigiit)

Akissuteqaat

(Nunanut allanut, Inuussutissarsiormut Aatsitassanullu Naalakkersuisoq)

Siullermeerneqarnera

Pipaluk Lynge, Inuit Ataqtigiit, immap naqqani aatsitassarsiormik ingerlatsinerup inerteqqutigineqarnissaa pillugu aalajangiiffigisassatut siunnersuummut matumunnga suliniuteqarsimaneranut Naalakkersuisut sinnerlugit qutsavigaara.

Aalajangiiffigisassatut siunnersuummi oqaatigineqartut, immap naqqani aatsitassarsiormik ingerlatsinerup atillugu avatangiisinut sunniisinaanerit pillugit ilisimasagut killeqarput.

DCE 2025-mi nalunaarusiamik saqqummersitsivoq, tassani ilaatigut inerniliisoqarluni imaani uumasut miluumasut, timmissat imarmiut aalisakkallu imaani aatsitassarsiormik ingerlatsinerup sunnerneqarnissamut akiuussinnaassuseqarnerat pillugu ilisimasat killeqartut tikkuarneqarlutik.

Taamaattumik immap naqqani aatsitassarsiorneq timmissanut, aalisakkanut imaanilu uumasunut miluumasunut, taamaalillunilu aalisarnermik piniarnermillu inuussutissarsiuteqarnerup, sunniinerluttussaattut nalinginnaasumik naatsorsuutigineqarpoq.

Taamaattumik ingerlatassat imaani avatangiisitsinnik sunniisinnaasut aallartinninneranni, siunissami qanoq kissaateqarnerluta isummerfiginissaa pingaaruteqarpoq.

Aatsitassanut tunngasunik suliaqarneq pillugu Inatsisartut inatsisaanni nunami akuersissutinik tunniussisarneq aammalu immap naqqani akuersissutinik tunniussisarneq immikkoortinneqanngillat. Taamaalilluni akuersissutit suut immap naqqani tunniunneqarsinnaanersut imaluunniit ingerlatassat suut suliarineqarsinnaanersut, inatsisitigut killilersuisoqanngilaq.

Taamaattoq akuersissutit Naalakkersuisunit akuerineqartussaapput. Ingerlatassani tassunga atasuni avatangiisitigut isumannaallisaanikkullu piimasaqaatit qaffasissut naammassineqartussaapput. Taamaattumik avatangiisinut sunniisarnernut tunngatillugu ilisimasat maannakkut pigineqartut tunngavigalugit immap naqqani piiaanermut ingerlatassat akueritinnissaannik pisinnaatitsissummik pigisaqartunut ajornakusoortussaavoq.

Taamaattoq Naalakkersuisut isumaqanngillat imaani avatangiisinik naammattumik allanngutsaaliutissagaatigut.

Naalakkersuisut nunatsinni aatsitassarsiormik ingerlatsisoqarnissaa kissaatigaat, kisianni tamanna isumannaatsumik pissaaq. Taamaattumik Naalakkersuisut isumaqarput, imaani

avatangiisinik sapinngisamik pitsaanerpaamik isumannaarisunik, ersarissunik
inatsiseqartariaqartoq.

Taamaattumik immap naqqani aatsitassarsiornermik ingerlatsinissap inerteqqutigineqarnissaa
siunertaralugu inatsisinik suliaqaqqullugit Naalakkersuisut peqquneqarnissaat pillugu,
Inatsisartut aalajangiiffigisassaattut siunnersuutip akuerineqarnissaa, Naalakkersuisut
inassutigaat.